

SAN LORENZO

- La Glesie (n°12)
- La pidele de aghe sante (n°14)
- Il Catapan (n°7)
- I coçons (n° 23)
- Fieste dai flôrs (n°27)
- La coce'n bike (n°62)



LA GLESIE

La glesie parochiâl di Sant Laurinç di cumò e fo slargjade e ristrutturade di plante fûr dal 1734; in chê volte si rivà insom anje cul cjampanili (1743).

La glesie e je intitulade a sant Laurinç martar.

Cu la capele grande, dute la glesie e je lungje sù par jù 12 pas, largje e alte sù par jù 6 pas.



SANT LAURINÇ

Al è il patron e protetôr dal paîs; si fasii fieste ai 10 di Avost. Tai ultins timps la Messe si le fâs di sere, po si va in procession cu la statue dal Sant.

Finide Messe dut il paîs al è invidât tal parc des fiestis, par mangjâ la angurie e zuiâ di tombule.

IL CATAPAN



Si trate di une sorte di agjende là che si registravin i nons dai muarts e dai benefatôrs che a vevin di sei ricuardâts tes messis.

A son ancje notis che a permetin di cognossi la storie e lis usancis dal paîs fin dal XIV secul.

Il catapan al met adun une part antighe (di cjarte bergamine) e une plui resinte (di cjarte di rîs); la scriture e je gotiche.

Tal 2001 chest document al è stât rinfrescjât des muiniis di clausure di un convent di Triest e po e je stade fate une mostre li de canoniche de glesie, dal mês di Lui al mês di Otubar dal stes an.

LA PIDELE DE AGHE SANTE

La pidele de aghe sante di piere blancje di G. A. Pilacorte a fo picade tal 1503, cuant che a Sant Laurinç al diseve messe Pari Matie; e je firmade, siglade e cu la date.

Ceste pidele e je interessante par vie che e à figuris che a mostrin imprescj che a coventavin par lavorâ i cjamps, tant che une vuarzine, forcjîs, une grape e une sape; chescj a cjapin il puest dai simbui religjôs par evidenziâ la opare dal om.



I COÇONS DI SAN LAURINC

“SAN LAURINC: IL PAIS DAI COÇONS”



Chest sorenon, dât de fantasie popolâr a chei di Sant Laurinç tai moments cjalts des lotis di cjampanili, al veve ancje un significât di dispresi.

Intun document dal archivi de glesie si à cjatât il parcè di chest sorenon.

Dal 1844 al murive il plevan dal paîs, un ciert Bartolomeo Passalenti (chel che al veve fate la canoniche e che al jere stât sapulît, in chês volte, tal ludidôr de glesie di sant Pieri in Selve, dongje dal simitieri). La parochie i restà al capelan, un ciert pre Antonio Sottile, che dopo un pôc di timp al scugnì ritirâsi.

Su la fin dal 1846 il gnûf plevan nol jere stât ancjemò nomenât e la int i scrivè une letare al vescul firmade di 44 cjâfs di famee cun dome 9 crôs.

Intal Jugn di chel an al fo elet plevan pre Giuseppe Lotti di Bertîl.

In chês volte tai paîs piçui no jerin ni scuclis ni mestris: i predis, fasint dutrine, a insegnavin a lei, a scrivi e a contâ.

Al è propit par chest che chei di Sant Laurinç a àn il sorenon di coçons: a jerin plui inscuelâts di chei dai paîs dongje.

E par chest chei di Sant Laurinç a àn sielzude la coce tant che embleme dal paîs.

FIESTE DAI FLÔRS

La fieste dai flôrs si le fâs tor de metât di Lui, pe Madone dal Carmin.

La fieste de Madone dal Carmin e je ai 16 di Lui, ma se e cole vie pe setemane si le fâs te domenie dopo. Fin cualchi an indaûr, par cheste fieste, la int dal paîs e organizave la sagre che e durave par dôs sabidis e domenîs. Tai ultins agns si fâs fieste dome di domenie.

La zornade e va indenant cussì: aes 11 di matine si dîs Messe, cjantade dal coro di Sant Laurinç cun plui predis. Aes 5 dopomisdì e tache la procession pal paîs, compagnade de bande.

Dopo de procession, si va tal cjamp pes fiestis, là che si scolte il concerti de bande e po e je la premiazion de balconade in flôr, spietade massime des feminis che a àn jemplât di rosis i puiûi des lôr cjasis. Cualchi zornade prime doi o trê esperts a fasin il zîr des stradis par judicâ la balconade plui bieie.

Di sere duçj a son invidâts pe cene tal parc des fiestis. In cheste ocasion si organize la tombola e si da il premi pe balconade in flôr.

Chesta fieste e je une tradizion une vore bieie che e va indenant di plui di 32 agns.



LA COCE'N BIKE



Ogni an, a Sant Laurinç, la prime domenie di Otubar si fâs la corse in biciclete: la coce 'n bike. E je une corse une vore cognossude e a rivin coridôrs di dut il Friûl. Il percors al passe ancje pai curtîi dal paîs, par cjapâ po i trois de campagne dulintor.

Cualchi volte la corse e à parts faturosis parcè che si à di passâ fossâi cun grandis pendencis e boscams plens di arbui. Altris voltis il percors al è plen di pantan e si riscje di colâ.

Ae fin a son premis par duçj, dal plui zovin al plui anzian, dal grup che al ven di plui lontan a chel che al à plui concorints.